

Mon – ina vischnanca surmeirana cun buns aspects

In portret publitgà da la revista «La vischnanca svizra»

■ (anr/gc) En l'organ da las vischnancas svizas – «La vischnanca svizra» – ha il redactor Daniel Dauwalder gist publitgà in bel portret davart la vischnanca da Mon en Val d'Alvra. I sa tracta d'ina contribuziun bain illustrada e che dat in cler maletg tant da fatgs istorics sco da la situaziun actuala da quest vitg surmeiran. La vista davent da la baselgia baroca da Mon sur la Val d'Alvra e Surmeir è unica. El center dal vitg sa chattan chasas da crap. Cun *Lisabet Albertin* ha il redactor da la revista numnada chattà ina dunna che ha pudì raquintar blers detagls da la vita da pli baud. A Mon eri alur tut auter – sco en tantas sumigliantas vischnancas grischunas. Ils detagls èn adina fitg interessants. Tals èsi che possibiliteschan numnadament da cumparegliar tanter ier ed oz e traire conclusiuns.

I dà tuttina bler vita

Cun blers èsi ì avant gnanc uschè ditg sco cun l'actual president communal da Mon, *Marius Augustin*, che na savaiva nagin pled tudestg fin ch'el aveva sis onns. E fin ella terza classa datti scola be en rumantsch. Sil champ scolastic vegn collavurà cun las vischnancas vischinas. La scoletta è a Mon, la scola inferiura a Stierva, la superiura a Salouf e la secundara a Casti. Il chanzlist communal è engaschè per 50 pertschient en quest uffizi e per l'ulteriura mesadad sco manader dal biro da posta.

Deplorablament è dapreschent la suletta ustaria – sco lieu da sentupada e discussiun – serrada. Ins tshertga dentant intensivament ina schliaziun per pudair l'avrir uschè spert sco pussaivel.

Il dumber d'abitants da Mon è cun 94 fitg stabil. Era han ins pudì registrar

l'onn passà 2000 pernottaziuns. Uniuns per propi el vitg na datti betg. Ses abitants fan dentant part da la societad da musica cun Salouf e Stierva, dal Chor maschadà baselgia da Stierva ed insaquants dal Chor viril d'Alvra.

Finanzas equilibradas

L'interess per l'avègnir è considerabel. Per occupar ils tshintg mandats da la suprastanza datti adina cumbats. Da lur decisiuns èn numnadament tuts pertutgads. La vegliadetgna media da la suprastanza munta a 36 onns.

Las finanzas da Mon èn equilibradas. La vischnanca ha expensas ed entradas ad onn da radund 670 000 francs. Ina terza da las entradas derivan dals tchains d'aua da l'ovra d'electricità a Casti. Quella producescha per la citad da Turitg. Il pe da taglia munta a 90 pertschient. Mon è classificà pertu-

tgant forza finanziaria el Grischun ella gruppa quatter (da tshintg).

Duas impurtantas baselgias

Sut il vitg sa chatta la veglia baselgia parochiala da s. Cosmas e Damian, già documentada 841, la plaiv perencunter pir 1440. Enconuschantas èn sias picturas muralas. La segunda baselgia, la nova parochiala, è deditgada a s. Francestg. Ella è vegnida eregida el 17. tshientaner dals paders chaputschins da la missiun retica en l'ensaina da la cunterrefurma. L'orgla deriva da la catedrala da Cuira. Mon ha in plevon ed uschia messa mintga dumengia e mesemna.

In grond vischin da Mon è Gion Gieri Bossi, uvestg da Cuira (1834–1844) stà. Avant che daventar canoni residenzial era el 20 onns plevon da sia vischnanca nativa.